



Reykjavík, 24. ágúst 2019
SFS2019020105
190. fundur
HG/sv/sp

Til skóla- og frístundaráðs

Frá Helga Grímssyni, sviðsstjóra skóla- og frístundasviðs

Efni: Svar við fyrirspurn skóla- og frístundaráðsfulltrúa Sjálfstæðisflokksins varðandi samráð við foreldra vegna skóla- og frístundastarfs í norðanverðum Grafarvogi

Á 188. fundi skóla- og frístundaráðs, 18. ágúst 2020 lögðu skóla- og frístundaráðsfulltrúar Sjálfstæðisflokksins fram svohljóðandi fyrirspurn:

Samráðsleysi hefur einkennt allar breytingar á skólahaldi í norðanverðum Grafarvogi og enginn upplýsinga- eða samráðsfundur haldinn með foreldrum um stofnun nýsköpunarskóla sem m.a. annars tekur við nemendum eftir að Korpuskóla var lokað. Marta Guðjónsdóttir skóla- og frístundaráðsfulltrúi Sjálfstæðisflokksins lagði því fram tillögu á fundi skóla- og frístundaráðs 23. júní sl. þess efnis að haldinn yrði samráðsfundur með foreldrum í norðanverðum Grafarvogi eigi síðar en í byrjun ágúst, fyrir skólabyrjun, til að fara yfir þær breytingar sem breytt skólahald og stofnun nýsköpunarskóla mun hafa í för með sér. Þar sem tillagan hefur ekki verið tekin fyrir og er ekki á dagskrá fundar ráðsins í dag er óskað svara við því hvort slíkur fundur hafi verið haldinn eða hvort til standi að halda slíkan fund.

Svar:

Breytingar á skóla- og frístundastarfi í norðanverðum Grafarvogi voru samþykktar í borgarstjórn 19. nóvember 2019. Samþykkt var að tveir skólar, Borgaskóli og Engjaskóli verði fyrir nemendum í 1.-7. bekk og einn sameiginlegur nýsköpunarskóli, Víkurskóli, verði fyrir nemendum á unglíngastigi í 8.- 10. bekk. Tvö frístundaheimili, Brosbær og Hvergiland, verði starfrækt í yngri barna skólunum og félagsmiðstöð í Víkurskóla fyrir unglíngana.

Þegar ákvarðanir um breytt skóla- og frístundastarf í norðanverðum Grafarvogi lágu fyrir voru settir af stað innleiðingarhópar fyrir sérhvern skóla til að vinna að breytingunum. Starfshóparnir eiga að starfa til a.m.k. tveggja ára. Í hópunum sitja fulltrúar allra hagsmunaaðila hvers skóla : stjórnendur, fulltrúar nemenda, fulltrúar kennara, fulltrúar frístundaheimila og félagsmiðstöðvar, fulltrúar foreldra, skrifstofustjórar skóla- og frístundastarfs á SFS, framkvæmdastjóri frístundamiðstöðvar Gufunesbær, fulltrúar annarra starfsmanna ásamt sérfræðingi í teymisvinnu og breytingum á skólastarfi. Starfsmaður á skrifstofu skóla- og frístundasviðs styður við vinnu sérhvers innleiðingarhóps.

Á sameiginlegum fundi innleiðingarhópanna þriggja þann 19. febrúar 2020, sem stjórnendur skóla- og frístundasviðs stóðu fyrir, kynnti Guðbjörg Lilja Erlendsdóttir sérfræðingur á umhverfis- og skipulagssviði, hugmyndir um lausnir í samgöngumálum til að tryggja sem best öryggi skólabarnanna í ljósi breytinganna. Tiltók hún hvernig brugðist yrði við ábendingum foreldra og annarra hagsmunaaðila, m.a. með betri lýsingu á gönguleiðum, gangbrautum og

lækkun hámarkshraða á vegum. Þá var farið var yfir markmið og hlutverk innleiðingarhópanna þriggja og það breytingastarf sem framundan er. Ingvar Sigurgeirsson, prófessor við Menntavísindasvið HÍ og ráðgjafi starfshópanna, fjallaði um hugmyndir um nýsköpun í skóla- og frístundastarfi og sóknarfærin sem felast í þeim.

Innleiðingarhópur fyrir Engjaskóla hefur hist tvisvar, 25. febrúar og 19. maí.

Innleiðingarhópur fyrir Borgarskóla hefur hist þrisvar sinnum, 4. mars, 18. maí og 10. júní.

Innleiðingarhópur fyrir Víkurskóla hefur hist þrisvar sinnum, 27. febrúar, 12. maí og 28. maí.

Auk innleiðingarhópanna var skipaður yfirhópur um innleiðingu breytinganna sem á að starfa til ársloka 2022. Í honum sitja fulltrúar úr innleiðingarhópunum þremur. Yfirhópnum er ætlað að tryggja að samfella skapist í skipulagi skólahalds, frístundastarfs og samgöngumálum. Fundur var haldinn með yfirhópi 11. júní sl. þar sem farið var yfir stöðuna í samgöngumálum og skólastjórnendur auk framkvæmdastjóra Gufunesbæjar fóru yfir stöðu mála varðandi skipulag skóla- og frístundastarfs fyrir haustið 2020.

Fundargerðir allra hópanna eru vistaðar á opinni upplýsingasíðu um verkefnið þar sem fundargerðir og aðrar upplýsingar er verða verkefnið eru birtar. Slóð síðunnar er <https://reykjavik.is/skola-og-fristundastarf-i-nordanverdum-grafarvogi>.

Fljótlega eftir skólabyrjun hefst vinna innleiðingarhópanna að nýju og má reikna með að fyrstu fundir þeirra verði í fyrri hluta septembermánaðar.

Á upplýsingasíðunni er fréttabréf sem sent var út til foreldra og starfsmanna í hverfunum, kynning um hugmyndir um nýsköpunarskóla og fleira. Áfram verður öllum upplýsingum komið inn á síðuna eftir framvindu.

Soffía Pálsdóttir, skrifstofustjóri frístundastarfs, og Soffía Vagnsdóttir, skrifstofustjóri grunnskólastarfs, sátu opinn netfund 25. maí sl. sem boðaður var af íbúaráði Grafavogs og sendur út á opinni Facebook-síðu. Á þeim fundi fylgdu skrifstofustjórar úr hlaði kynningu frá Guðbjörgu Lilju Ellertsdóttur, yfirverkfræðingur á umhverfis- og skipulagssviði borgarinnar, um samgöngubætur í norðanverðum Grafarvogi.

Covid-ástand hafði að sjálfsögðu áhrif á skipulag opinna funda um verkefnið á miklum umrótatíma sl. vor.

Verkefni sumarsins

Verkefni sumarsins, í sumarfrí skólanna, hefur fyrst og fremst verið að ganga frá ráðningum, vinna í innra skipulagi, s.s. búnaðarmálum, tæknimálum, nafnabreytingum, heimasíðu og fjölmörgu öðru sem þarf að hyggja að við breytingar sem þessar. Sú vinna hefur alfarið verið innt af hendi af starfsfólki skóla- og frístundasviðs í samvinnu við önnur svið borgarinnar og ytri stofnanir sem þjóna skólunum.

Samgöngumálin

Guðbjörg Lilja Erlendsdóttir yfirverkfræðingur á umhverfis- og skipulagssviði borgarinnar vann mikilvæga vinnu á sameiginlegum fundi með skólaráðum Vættaskóla og Kelduskóla sem haldinn var í Hlöðunni þann 4. desember 2019. Markmið fundarins var að rýna þá staði sem þurfti sérstaklega að skoða vegna samgöngubóta í hverfinu í kjölfar breytinga á skóla- og frístundastarfi.

Á sameiginlegum fundi allra innleiðingarhópanna 19. febrúar 2020 kynnti Guðbjörg Lilja Erlendsdóttir hugmyndir um lausnir í samgöngumálum eins og að ofan er getið. Hugmyndir að lausnum voru unnar eftir vinnu með skólaráðum Vættaskóla og Kelduskóla þann 4. desember 2019.

Á opnum fundi 25. maí 2020, sem íbúaráð Grafavogs stóð fyrir og streymt var, fylgdu skrifstofustjórar úr hlaði kynningu frá Guðbjörgu Lilju Erlendsdóttur yfirverkfræðingi á umhverfis- og skipulagssviði borgarinnar um samgöngubætur í norðanverðum Grafarvogi. Niðurstöður þessara funda eru grunnurinn að þeim samgöngubótum sem nú er unnið að í hverfinu. Guðbjörg Lilja kynnti einnig stöðu mála í samgöngubótum og áætlaðan tímaramma með yfirhópi innleiðingarhópa þann 11. júní sl.

Nýju skólarnir taka við

Nú hafa skólastjórnendur nýju skólanna Þriggja, Borgaskóla, Engjaskóla og Víkurskóla ásamt stjórnendum frístundaheimilanna Brosbæjar og Hvergilands og félagsmiðstöðvarinnar Vígynjar tekið við keflinu um almennar upplýsingar til foreldra og innra starf skóla- og frístundastarfsins á komandi skólaári.

Vert er að geta þess að um þessar mundir eru allir skólar og frístundastarfsemi borgarinnar að undirbúa starf vetrarins með sínu starfsfólki á fyrstu starfsdögum haustsins eins og venjan er, og boða síðan foreldra og nemendur inn í skólana til að kynna vetrarstarfið frekar. Því er eins farið með skólana þrjá og starfsemi frístundastarfs í norðanverðum Grafarvogi.